



MUSAFIR HAJI 1434H

Noor 'Aina Abdul Razak

Hampir separuh abad berjalan di muka bumi Allah. Kenangan lama kembali mengetuk minda tua. Sembilan tahun yang lalu, syukur Allah telah mengurniakan rezeki bermusafir ke bumi penuh barakah, bumi kecintaan Rasulullah. Kisah ini sebagai permulaan satu ceritera panjang. Semoga ia dapat menjadi panduan dan memberi manfaat biar pun sekelumit cuma pada para pembaca yang sudi menatap dan menunggu hingga ke hujung garisan. Zaman pandemik Covid-19 ini, kisah dan laluan bermusafir pasti berbeza. Aku sekadar menyampaikan apa yang telah dilalui. Mungkin ada sedikit ilmu di situ tanpa disedari. **(JANGAN LUPA DAFTAR HAJI DULU YA.)**

"Dan serukanlah umat manusia untuk mengerjakan ibadat Haji, nescaya mereka akan datang ke (rumah Tuhan) mu dengan berjalan kaki, dan dengan menunggang berjenis-jenis unta yang kurus yang datangnya dari berbagai jalan (dan ceruk rantau) yang jauh." (Al-Haji 22:27)

Setahun dua sebelum menerima panggilan Agung ini, duhai bakal-bakal Duyufurhman sekalian, hadirlah ke mana-mana kursus haji bersiri yang ada berhampiran tempat tinggal. Kali pertama aku hadir kursus memang tidak cukup. Pandangan masih samar-samar. Kali kedua hadir kursus haji guru berbeza, jerebunya sudah berkurangan. Pergi pula kursus haji buat kali ketiga. Alhamdulillah. InsyaaAllah keyakinan sudah ada. Namun begitu, sebanyak mana pun kursus haji yang aku hadir, pasti ada persoalan demi persoalan yang timbul berkaitan haji. Sehingga seketul jasad ini berada di sana dan mengalami suasananya. Itu pasti! Jangan sesekali berasa sudah cukup ilmu walaupun mengikuti 10 kursus haji. Kefahaman kita tak akan mencapai tahap ustaz ustazah yang memang menjadi

makanan mereka setiap kali musim haji tiba. Memang salah tanggapan itu.

Jika berpeluang, hadirkan diri semasa kursus haji 17 siri anjuran Tabung Haji. Kealpaan diri sendiri menyebabkan aku tidak mengikuti kursus anjuran Tabung Haji. Namun, Kursus Intensif Haji yang dihadiri amat-amat membantu. Akhir sekali, bakal-bakal jemaah dikumpulkan di Kursus Perdana Haji. Kursus separa praktikal yang dapat memberi gambaran bagaimana tawaf, mabit di Muzdalifah dan melontar dilaksanakan. Berlatihlah berjalan-jalan. Di sana nanti, kita akan berjalan dan terus berjalan dan berjalan. Ia menuntut kudrat yang hampir mencapai separuh abad, dan sudah tentu kesabaran tahap tinggi diperlukan. Sabar, memang kena sabar. Banyakkan istigfar. MasyaAllah. Kita mampu buat InsyaaAllah. Oh, ya. Semasa kursus ini juga jemaah-jemaah Pulau Pinang menerima kit haji mengandungi vitamin, pencuci tangan, berus gigi dan sebagainya (sumbangan pelbagai syarikat). Sebagai jemaah Kedah, aku menerimanya di Tabung Haji Kulim. Kit mengandungi sepasang telekung bagi perempuan dan sehelai kain pelikat bagi lelaki, pengecas antarabangsa dan lain-lain lagi.

Tiba masanya, sepucuk surat rindu diterima daripada Tabung Haji, menyatakan aku dan suami diterima sebagai tetamu Agung. Perlu menjawab terima atau tidak. Boleh pilih untuk ke Madinah atau Makkah dahulu (ini yang menentukan kapal awal atau hujung musim haji). Begitu juga pilihan lapangan terbang. Aku memilih penerbangan terus dari Bayan Lepas. Sebab itulah teman-teman serumah semuanya jemaah Pulau Pinang sedangkan aku jemaah Kedah. Pilihan subsidi RM5000 (untuk kali pertama) juga ditanya. Jumlah semua RM15K (untuk kali kedua) dan kali pertama boleh juga jika memilih RM15K. Sudah tentu aku terima subsidi RM5K. Jadi bayaran RM10K saja. Setahun dua selepas 2013, pemilihan lapangan

terbang sudah tiada. Semua jemaah akan berkumpul di KLIA untuk ke Madinah atau Makkah. Begitu juga nilai untuk mengerjakan haji pasti berubah pada musim akan datang.

Selepas kursus intensif haji, jemaah akan dimaklumkan tarikh penerbangan pergi dan balik. Surat inilah yang amat dinanti-nantikan untuk memohon pelepasan cuti. Buku pemeriksaan kesihatan dan gelang pengenalan sudah diterima selepas menjawab surat penerimaan sebelum ini. Aku menjalani pemeriksaan kesihatan mengikut masa yang ditetapkan. Jika tidak, agak sukar mencari slot masa yang sesuai. Aku perlu mengambil cuti rehat untuk urusan ini memandangkan pemeriksaan dijalankan di Klinik Kesihatan Kulim. Suntikan wajib satu sahaja. Dua lagi suntikan terpulang pada jemaah dan aku tidak mengambilnya memandangkan slot masa yang diberi tidak sesuai. InsyaaAllah, Allah ada untuk jaga kita.



Dari Bayan Lepas, ada tiga penerbangan (dirujuk sebagai KT – kapal terbang) ke Madinah dan dua ke Makkah. Aku memilih untuk memasuki Kota Makkah dahulu. Jujurnya, jika diberi pilihan sekali lagi, aku pasti memilih penerbangan terakhir ke Makkah iaitu dari KLIA. Ini kerana, di hujung-hujung musim haji ramai jemaah sudah berada di Madinah. Suasana di Makkah agak lengang dan selesa untuk mengerjakan tawaf. Suasana kurang sesak walaupun masih berjuta umat negara lain berada di sini. Alangkah seronoknya jika dapat tawaf dengan selesa tanpa perlu berhimpit-himpit. Allahuakbar.

Dari masa ke semasa Tabung Haji akan menghantar surat-surat berkaitan untuk perhatian kita. Jangan abaikan. Semasa aku ke sana, jemaah wanita di bawah 45 tahun mesti mempunyai mahram. Mesti tunjukkan bukti jika itu suami yang mengiringi. Tarikh dan masa yang dijadualkan oleh pihak Tabung Haji untuk urusan-urusan berkaitan haji perlu diikuti sebaik mungkin. Selesai urusan-urusan berkaitan, aku baru kisahkan persediaan keperluan haji. Setiap Sabtu, aktiviti membeli belah keperluan haji.

Semasa mengikuti kursus haji, bakal-bakal jemaah juga sudah diberitahu mengenai senarai barang-barang yang perlu dibeli utk dibawa ke Tanah Suci. Kalau nak ikut senarai silakan. Jika tidak, boleh buat pilihan sendiri. Rajin-rajinlah bertanya, tidak rugi sedikit pun. Berdasarkan pengalaman aku (terasa macam mahu terbang ke sana lagi), aku senaraikan setakat mana sel-sel otak ini masih berhubung untuk menyampaikan apa yang diingati.

1. T-shirt bepocket utk wanita. Tidak perlu jika berbaju kain tebal dan telekung/tudung labuh sentiasa. Tujuannya untuk menyimpan duit atau pengenalan berharga. Jangan pula membawa beg tangan ke sana ya. Aku membawa sehelai pemberian kakak, tetapi digunakan untuk tidur sahaja 😊.
2. Jika tidak mahu bertelekung, pakailah pakaian dan tudung labuh yg boleh dibawa solat. Lebih selesa. Selepas solat boleh pergi makan-makan atau membeli-belah dengan selesa...hehehe.
3. Losyen badan dan tangan, pelembap mulut dan sewaktu dengannya terpulang kepada diri masing-masing. Ia amat perlu jika kulit mudah kering dan sensitif. Aku bawa semuanya tetapi tidak digunakan. *Sunproof* rasanya hehehe.
4. Ubat-ubatan untuk stok sepanjang di sana, terutama ubat-ubat yang khusus untuk kegunaan sendiri. Setakat demam atau batuk, boleh buat kunjungan mesra ke klinik Malaysia di sana. Vitamin C dan multivitamin aku tak perlu beli sebab sudah diberi percuma semasa kursus haji. Stok untuk dua bulan, tapi sempat nak makan juga. Degil juga ini jemaah ya.

5. Pakaian harian, terpulung. Mahu pakai baju kurung, jubah, apa saja tidak ada masalah. Asalkan kita selesa. Rasa nak bawa baju batik pergi kerja pun boleh. Aku selesa berseluar dan berbaju kurung, mudah bergerak ke mana-mana.

6. Sarung tangan dan stokin sila bawa dan pakai. Jangan buat-buat lupa. Stokin pula, walau hitam dan rasa tebal, perlu hati-hati. Bila dipakai ia menjadi cekang, beleklah bahagian buku lali, pasti nampak kulit. Aku selalu bawa *spare* satu dann pakai dua lapis semasa solat. Kalau tidak, belilah yang betul-betul tebal.

7. Jika tidak tahan habuk, pakai lah *mask*. Ada yang beli kain purdah di sana. Aku bawa, tetapi tak guna, tutup hidung dengan tangan saja atau telekung/tudung. Rimas pakai *mask*, rasa tidak boleh bernafas. Dengan musim Covid-19 sekarang sudah pasti memerlukan jemaah menggunakan *mask*.

8. Sebelum ke sana, boleh menukar Ringgit Malaysia ke SR2000 (Saudi riyal). Jika ditempatkan di ibu pejabat Tabung Haji (Abraj Janadriyah), itu durian runtuh namanya. Di situlah klinik, farmasi, bank, cafe, kaunselor, ustaz ustazah. Nak keluarkan duit setiap hari pun boleh.

9. Baju/jubah tak perlu bawa banyak. Cukup dua atau tiga pasang saja. Sampai di sana boleh beli yang baru. Bila lagi kan? RM40-50 boleh dapat yang elok bersulam (bukan jubah abaya). Pilihlah nak warna apa. Insyaallah ada, cuma kena pandai mencari sebab banyak hitam dari yang berwarna kalau di Makkah. Di Madinah tak dak masalah. Lagipun kita hendak beribadah, beli untuk keperluan semasa sahaja. Jangan sampai membazir.

10. Serondeng dan sewaktu dengannya silakan bawa jika berasa tekak masih lagi perlukan rasa Malaysia. Aku sebilik enam orang. Tiga orang bawa serondeng tidak habis pun makan di Makkah. Masing-masing sudah serasi dengan sajian yang disediakan pihak Muassasah. Tidak mewah tapi alhamdulillah. Sekali hadap memang habis, tidak membazir. Mohon doa supaya Allah memudahkan, InsyaaAllah.

"Kemudian hendaklah mereka membersihkan dirinya dan hendaklah mereka menyempurnakan nazar-nazarnya, dan hendaklah mereka tawaf akan Baitullah (Kaabah) yang tua sejarahnya itu". (Al-Haji 22:29)



Kad ini nyawa kita di sana. Jaga baik-baik. Nak keluarkan duit di kaunter Tabung Haji perlu bawa ni. Banyak maklumat kita di sini. Jangan hilangkan ya wahai jemaah-jemaah sekalian. Buat bakal-bakal hajjah sekalian, aku titipkan tambahan untuk panduan kalian. Semoga musafir kalian ke bumi barakah sentiasa dalam rahmatNya Yang Esa.

1. Berkenaan jubah wanita. Adalah sangat baik jika jubah itu berpocket. Sebabnya, apabila hendak ke tandas, boleh dimasukkan *handphone*, sarung tangan, stoking, jam dan sebagainya. Walau pun ada beg galas (terima kasih BSN), di dalamnya mungkin berisi Al-Quran dan buku doa. Beg ini menjadi peneman setia kita sehinggalah pulang ke tanahair tercinta.



2. Barang-barang *toiletries* seperti sabun mandi, sabun basuh, syampu boleh didapati di sana. Jangan beratkan beg. Biar berat semasa balik. Tetapi, sayugia aku ingatkan, harga seketul sabun mandi di sana SR5 (agak mahal). Sekarang mungkin lebih lagi. Segala keperluan membasuh pakaian, zaman aku SR2 satu item. Baldi, penyangkut baju dan penyepit beli sahaja di sana.



Penginapan aku di Makkah di Abraj Janadriyah- Wing C. Ada Wing-A dan Wing-B. Ada yang dapat sebilik 4, 5, 6, 7 atau 8 orang bergantung pada saiz bilik. Di depan pintu hotel ada kedai SR2 (macam kedai RM2). KT50 maksudnya penerbangan ke-50 dari Malaysia.

3. Dulu, dulu la orang kata, *handphone* tidak boleh bawa masuk. La ni boleh bawa. Tiada masalah. Nak bawa tablet? Notebook? InsyaaAllah boleh.

4. Jika rasa tarikh untuk mendapat panggilan haji masih jauh pandang ke depan, tunaikan dahulu umrah jika mampu. Umrah ini boleh selesai dalam dua ke tiga jam saja! Bila melaluinya, baharu kita tahu perjalanan ibadah ini bagaimana. Selama ini mendengar cerita kedai kopi sahaja.

5. Jika mahu dan rajin, belajarglah sikit-sikit perkataan Arab, terutama yang berkaitan dengan nombor. Di Makkah kebanyakan pекedai tidak fasih berbahasa Inggeris. Ini saranan saja. InsyaaAllah semuanya baik-baik sahaja apabila ayam bertemu itik, bercakap dalam dua bahasa

berbeza, bahasa isyarat menjadi perkara utama. Pandai-pandailah haji dan hajjah semua.

6. Ini penting buat bakal-bakal hajjah. Sebelum pergi, simpan rekod haid bulanan anda. Sekurang-kurangnya empat ke lima bulan sebelum ke sana. Buat catatan pada jadual period. Seditil yg boleh. Bila mula (waktu/jam) dan warna darah. Antara hari-hari haid, ada atau tidak hari yang bersih. Catatkan, jika rajin. Apa yang Allah mahu uji di sana tidak boleh diduga. Walaupun mengikut kebiasaan di tanahair. Ada yang mengambil pil perancang, di Makkah tiada masalah, tiba di Madinah haidnya terlebih hari. Ada yang mengambil hormon, sudahnya haid bersambung dengan istihadah. Apa-apa pun, berdoalah sentiasa untuk dimudahkan semua urusan.

7. Para wanita, tolong bawa stok *panty liner*. Sukar untuk dapatkan. Masalah wanita terlalu rumit. Rajin-rajinlah berjumpa ustazah jika ada sebarang masalah. Jangan ambil mudah berkaitan hukum Allah. Nanti menyesal tak sudah. Alhamdulillah, aku ada teman bekerja di Makkah. Ketika sebilik hampir kehabisan stok, teman inilah yang menolong. Semoga Allah memberi ganjaran berlipat ganda kat Fuhaina sekeluarga.

8. Satu lagi untuk kaum wanita. Harap-harap teman sebilik anda ada yang membawa kapas muka. Selain untuk mencuci muka, amat berguna ketika menghadapi masalah wanita. Tak percaya? Allah nak uji kita dengan pelbagai cara.

9. Lampu suluh kecil, sarung kasut, uncang batu dan botol spray semuanya aku dapat percuma. Terpulung untuk guna atau pun tidak.

Alhamdulillah. Semoga persediaan sebelum ke Tanah Suci ini ada sedikit manfaatnya buat pembaca. Sekarang ini mungkin sedikit berbeza daripada apa yang aku nukilkan. Jumpa lagi di siri akan datang.

-NAAR-

